



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 6 Yangia anidakangma : Tir Yimyim

tiryimyim@aolima

tir yimyim

TAPAK 3

Sikkim nung district 3 shia MP  
kaka alitsüla: CMPS Golay

BJP-i China anema surgical  
strike agitsüla: Asaduddin Owaisi



VOL. XX NO. 229 (ADOK 229) DIMAPUR YANGTEPNÜ (THURSDAY)

AAMI (JUNE) 01 2023

₹ 5.00

## Nagaland nung World No Tobacco Day among

Cigarettes	45,360	44,182	33,136	200.41	150.31
Bidi	11,685	1,28,648	96,486	150.32	112.74
Pan Masala with Tobacco	21,157	2,74,188	2,05,641	580.10	435.07
Pan/ Tamul with Tobacco	22,118	2,27,407	1,70,555	502.98	377.23
<b>Grand Total (Rs. in crore)</b>				<b>1,434.81</b>	<b>1,076.10</b>

**Dimapur, May 31, 2023 (TYO):** India nung arishi küm 13-15 tsungda alirtemi moko teimtiba achiba state tanabubaji Nagaland lir aser kümshia Nagaland nung moko achirtemi Rs 1,434.81 crore shi endoker.

Iba osang ya Bodbarnü Kohima nung World No Tobacco Day ayonga amongdang metetdaksü.

Iba sentong ya State Tobacco Control Cell, National Tobacco Control Programme (NTCP), Nagaland ajanga ayongzük aser "We Need Food, Not Tobacco" omen nung ajemdaker among.

Sentong nung Commissioner & Secretary, Health & Family Welfare Department Y Kikheto Sema, IAS-i tetushi süa jaoker ka ama shilem agi aser pai State Tobacco Control Cell-i Tobacco Products Expenditure in Nagaland indang Pilot study asüba osang lemsatöp.

1987 küm World Health Organisation (WHO)-i World No Tobacco Day amongtsü tenzük aser iba ya moko wara ajanga iba ajanga tashidak balala nungi kümzuka alitsü osang prokshitsü atema amonger ta Kikheto Sema-i ashi.

Taküm indang omen ya "We Need Food, Not Tobacco" lir aser iba ya moko ayimertem dang tanga tsünusenbongtsü anepalutsü tayongzükba agütsütsü atema lir ta pai ashi.

"Linük 124 nung aluyimertemi moko ya ali tasazük 3.2 million hectares nung cash crop ka ama ayimer.

Külen, alima nung rara balala, tsüngsang melenshiba COVID-19 wara ajanga timtem balala agütsüba ajanga chiyungtsü tebilemstü tuba akümer. 2019 küm alima nung nisung million 135-i acute food insecurity ajurua liasü aser tang ibaji million 349 kümogo" ta Kikheto-isa ashi.

Moko lu ayimba ajanga asen temang, aluyimertem temang aser alima temang nung timtem agütsür, ta Commissioner & Secretary, H&FW-isa ashi.

Anungji asenoki moko melena tanga chiyungtsü tajung yimra, iba ajanga nisung ajak atema tajangzük bentsür arutsü ta Kikheto-isa shisem.

India kübok North East nung cancer putetertem rongung tebur 49% aser tetsür 22% tashi moko dak sendakba cancer lir. Tawa tu Nagaland nunga mozü ki balala nung nisung 700 tashi moko dak sendakba cancer agi kangshia anepaluba bushitetogo, ta pai ashi.

"India nung moko teimtiba achiba state ji Mizoram sülen Nagaland lir aser Nagaland nung arishi küm 13 nungi 15 tsungda alir 43%-i moko achir. Anungji bangdak department-i dang masü saka nisung ajaki iba khuret atema mapa inyaksüla" ta Kikheto-i ashi.

Tanü paisa anogo 60 nü NO TOBACCO CAMPAIGN tenzüksüdang kaketshirtem aser tanurtem dang NO TOBACCO Home maparen inyaksü ayongzük.

## Amit Shah-i Moreh nung Kuki nunger den ajurutep

**Moreh, May 31, 2023 (Agencies):** Union Home Minister Amit Shah-i May 31, 2023 nü India-Myanmar aritsü anasa aliba Moreh jila semdang aser Kuki civil society teloktem den ajurutep.

Amit Shah-isa tanü anüngdang Kangpokpi district semdang aser telok balala den ajurutepa sendentem amen.

"Union Home Minister aser Minister of Cooperation Amit Shah-i tanü Moreh, Manipur nung Kuki nunger telok ka den ajurutepogo" ta Union Home Ministry Spokesperson-i metetdaksü.

Paisa Moreh nung Tamil dokan kiburtem dena tanga kintem nungi teshimtet nisungtem den ajurutep ta osang ajanga ashi.

Amit Shah-isa Moreh nung Centre aser state forces nungi ketdangsürtem den ajurutepa

security osang metetpela liasü. Iba mapang Home Secretary Ajay Kumar Bhalla aser Intelligence Bureau Director Tapan Kumar Deka nati pa meina liasü.

**Meitei teloktemi Kuki-Zo yimtsüngtem amaker: ITLF**

Union home minister Amit Shah-i yimjung alitsü mepishiaka Manipur nung tali bilemloka oa inyaksangshiba Meitei nunger teloktemi Kuki-Zo yimtsüngtem amakba manener ta Indigenous Tribal Leaders' Forum (ITLF)-i tanü metetdaksü.

"Union home minister Amit Shah aser Centre nungi ketdangsürtemi Lamka nung lisopur lenirtem den ajurutepaka Meitei teloktemi Kuki-Zo yimtsüngtem (Nongdam & Maphou) amak" ta ITLF-i ashi.

"Iba ajanga Meitei nunger tali bilemloka oa inyaksangshiba teloktem tasü aitba sayur

kechiyong parnok Manipur sorkari pusema nungiter" ta ITLF-isa ashi.

Item "radical Meitei groups" yagi Manipur sorkar teyari agia Kuki-Zo yimtsüngtem samatsütsü alizüng lir ta parnokisa ashi.

Manipur sorkar aser state armed forces-i May 3, 2023 nungi lisopur yimtsüng balala nung lisopurtem anema mapa inyaka arur aser parnoki yimtsüng aika mitsü küma rongdoktsüogo aser tai maketba lisopurtem aika taküm samatsüogo ta taoba nung ITLF-isa shia liasü.

"Lendenlen aliba telungpurtemi Manipur police uniforms agir lisopurtem anema mapa inyakba osang angazükogo" ta ITLF-isa ashi.

Parnokisa Manipur nung President's rule alitsü aser N Biren Singh-i aniba BJP sorkar anendaksütsü takhangba agütsür.



### Auron ke liye sirf business hai, hamare liye duty!

# On Duty, Always!

## IndianOil Hamesha Open!



### KUHUBOTO AREA AO BAPTIST FELLOWSHIP PELABA METETDAKTSÜR :

Tamasa Kuhuboto Area Ao Baptist Fellowship ajanga na aser ner kibong dang Khrista temeim salem metetdaksür.

Onok Kuhuboto Area nung Aor kibong ishika longjemer Tsüngrem külemstü tenla ki ka yanglutsü bangjem, saka kimong alitsü rongsen makai shisaboluseta aliba mapang nai aser ner kibongi Tsüngrem temeim bilemteta ozü Fellowship nem ter shilem aser temulunger tenla agütsüba ajanga tenla kimong alitetogo. Iba takok asoshi Tsüngrem tenüng asanger aser tenla agütsür nenok ajak dang kanga pelaba osang sangdonger.

Ano maneni nenok sarasadem aser teyari nungdaker. Tsüngremi na aser ner kibong maneni moajangma.

Sd/-

Mangyang Jamir

Chairman, Kuhuboto Area Ao Baptist Fellowship.

# Business Association of Nagas, Tuli Chapter tenzükogo



Tuli nung May 30, 2023 nü Business Association of Nagas (BAN) Tuli Chapter tenzükodang tangokba noksa ka nung BAN Nagaland tir L. Mongkum Jamir den BAN ketdangsürtem aser BAN Tuli Chapter ketdangsürtem angur.

**Dimapur, Monupii/May 31 (TYO):** Business Association of Nagas (BAN) tir L. Mongkum Jamir-i anir züngsem temi May 30, 2023 nü Business Association of Nagas (BAN) Tuli Chapter tenzükja liasü, kong Peter Lokho, AGM, SBI RBO Mokokchung; Tendimongba, Branch Manager SBI Tuli; Ranjit Dutta Branch Manager SBI Tzudikong aser All Ward Union Tuli, Tzudikong Adhoc Town Council nungi ketdangsürtem aser Tuli area nungi entrepreneurs tem dena liasü.

Iba sentong nung Peter Lokho-i o tatsüka jembidang, Naga nung entrepreneurs asoshi bank nungi maongka jenti agütsür aser bendanga agütsür

business mapa inyaksü jangra aliba lanurtem nem business loan tem agütsür, ta ashi.

Tarutsü anogotem BAN Tuli Chapter den akokba lenmang nung yaritepsü, ta pai ashi.

Iba sentong nung BAN Nagaland tir, L. Mongkum Jamir-i Chief Minister's Micro Finance Initiative (CMMFI), Mudra loan, Stand Up India, MSME aser ano sorkari scheme balala agütsüba indang tejangja lemsatepa liasü.

Subsidy kisung amshia business inyaksü memerangtsüla aser local entrepreneurs temi ecosystem adokdaksütsüla aser pei asoshi dangari inyaksüba nung metaloka malitsüla, ta pai ashi.

BAN tir-isa iba tentet indang

nükjidong ya lanur entrepreneurs dak rangloker Naga nung rongsenketzung aintsü asoshi lenmang sayutsü aser ajungkettsü lir, ta ashi.

Iba senden nung BAN Nagaland Executive Council züngsem, Tiatemsu Longchar aser Akum Jamir natia BAN Nagaland teyari nung mapa kima inyaksü scheme balala indang lemsatep aser itemji Tuli subdivision nung BAN Tuli Chapter ajanga inyaksü, ta ashi.

Iba sentong nung menden Imnanungsang Lemtor, convener, BAN Tuli Chapter liasü aser Tzudir Restaurant kibur Molung Tzudir-i sarasadema liasü aser secretary Pangerkumba-i melepzung o jembia liasü.

# Kohima nung Inter State Truck Terminus semzükogo

**Dimapur, Monupii/May 31 (TYO):** Advisor, Transport & Technical Education, Government of Nagaland, Temjenmenba ajanga May 30, 2023 nü ISTT, Kohima nung Inter State Truck Terminus semzükja liasü.

Iba sentong nung jembidang, iba terminus ya tang nungi amshitsü aser iba ki yanglu tenzükodang nungi nungdakba senotsü bushiba mapang tashinung mapa meranga inyakogo, ta ashi.

Pai iba tesem amshitsüpur ajunga dang ibai nübur meyong ama bilemtsü aser kanga junga anepalutsü nenshia ashi.

Osetsüset aser khu bena aliba truck aika arua iba terminus nung anenzüktsü, anungji meta talang nungi aruba nüburtem nem timtem magütsü anisüngzükdaksütsüla, ta Model village nung alirtem dang ashi.

Transport Department

ajanga iba rongsen kanga kumdanga amshitsüla, anungji state atema revenue arutsü. Iba terminus ya kanga nungdaka liasü, talisa state yimtiba nung lenmang mesüba ajanga nungdaka liasü, koba tangbo tajemba akumtsü, ta pai ashi.

Kodang sorkari iba ama ki o jen yanglur, item yagi nübur jenti ajanzüktsüla, anungji danga state tem nungi aruba nüburtemi iba tesem amshitsü ajungshir, kechiaser iba ya ajanga revenue bendenba kisung masü saka parnok dang state tebour ajungba sayutsü, ta pai ashi.

Pai ketdangsürtem dang department anitsü aser iba ama sorkart meyong rongsen yanglutsü asoshi Tsüngrem dang nungi shisatsü meshitsü ayongzük.

Pai transport ketdangsür aser NST ketdangsürtem dang shisa tasen bener arua state nung Transport department ya revenue timtiba bendenba

department kumdaksütsü ayongzüka liasü.

Kasa mapang contractor temi mapang shidak nung PWD ajanga 2013 küm jenjang atetsüba nung renemba asoshia tenüngsang agüja liasü.

General Manager, NST, Shikaho P. Yeptho-i iba sentong tenzükja jembidang iba project indang osang agütsü aser project ya Executive Engineer (Const) lenisüba kübok Department indang Civil Engineering Wing kübok takok ngua inyak, ta ashi.

NEC ketdangsürtem aser iba project nung densema alirtemi mapang shidak nung achayanga inyakba aser senotsü mapang shidak nung agütsüba ajanga mapa takok ngua inyak, ta ashi.

Iba Inter State Truck Terminus lapokba ajanga nüburtem kanga ajanzüktsü aser jila nung traffic tajemba akumtsü, ta paisa ashi.

# Mokokchung District Pensioner Association ajanga metetdaksür

**Dimapur, Monupii/May 31 (TYO):** Chief Minister's Health Insurance Scheme (CMHIS) Pensioner Association Nagaland Pensioners' Association dang District Pensioners' Association ketdangsür ajak senden ajak nungi arua senden mena liasü, ta District Pensioner

Association, Mokokchung ajanga sangdong ka nung ashi. Iba senden nung lemtetba ama Nagaland Government dangi NPA representation ka zülüogo. Government nungi telangzüba tejangja arutsü yimlar aser iba telangzüba nung ajemdaker kechi tim aji inyaka aotsü renema lir, ta Mokokchung District nung aliba pensioner ajak nem metetdaksür, ta sangdong ajanga ashi.

# Imrong Aier-i züluba "Somewhere in Time" kaket ka sayaogo



**Dimapur, Monupii/May 31 (TYO):** Urban Hub Café nung May 30, 2023 nü Imrong Aier-i züluba "Somewhere in Time" kaket saya liasü.

Imrong Aier ya Mokokchung nungi freelance painter, digital illustrator aser comic artist ka lir aser Fine Arts College, Guwahati nung zünga liasü.

Pai South Korean webtoon app, Tapsa nung 'Only the Hunter' yanglua lir.

"Somewhere in Time" kaket nungya ashitsü makokba lenmang agi sünga lir, kong tia aser tejangraba nem anidakja pa tejangraba, temeim aser takum aliba nükjidong nguteter.

Iba kaket ya Bookipedia ajanga adok aser iba "Somewhere in Time" kaket ya Bookipedia-i adokba kaket pezü buba alitsü. Kaket ya Dr Lanurenla, Asst Professor, Department of English, Fazl Ali College ajanga sayatsü.

Kaket zülur Imrong Aier-i iba kaket züluba otsü lemsatepdang,

tebui "Sempet tajung aketba nisung peria lir aser parnoki kanga junga jenjang tajemba nung mapa inyaker, anungji jenjang ajungkettsü aser ajemtsü asen dak keta lir," ta ashiba ajanga pa ajungmesoa iba kaket zülü, ta ashi.

Fazl Ali College, Mokokchung nungi Department of English nung Assistant Professor, Bendangrenla-i kaket adoktsür tenüng nung jembidang, "Graphic novel ya jangratemtsü aketba otsü kaket lir aser züngdangtsü makokba lenmangtem lir," ta ashi.

Dr Lanurenla-i kaket sayatsüdag, "Element ka tematiba jenjang nung lir aser ibaji 'creative inputs' ya lir. Artificial Intelligence, computer amshia yangluba, machine temi mapa aika inyaktetsü saka langka ka malemtetsü mesüra merakzüktsü aser ibaji 'creative inputs' ya lir aser meimchir tekolok nung tebour tajungji ibaji lir," ta ashi.

# LKM-i tsükong nung kaket reju semdanga jaja

**Dimapur, Monupii/May 31 (TYO):** Langpangkong Kaketshir Mungdang (LKM) office ajanga Langpangkong litsü nung aliba Government School tia repranga aser tesayurtem ajungshia Government Middle School, Government High School aser Government Higher Secondary School ajak agi 24 tashi anogo pezü agia sema jaja liasü.

Iba mapang nung school teimba nung Head Master, Assistant Headmaster, Subject teacher, class room peria maliba den külemi lenmang tajung maliba ajanga Government School tia tamajungba akümbe dang masü saka kaketshir

nükjidong aser tia tamajungbai aiba ajiteta kanga nemjemer, ta LKM tir Imlinok aser tongti zülur Meyitongpang nati sangdong ka ajanga ashi.

Maneni school tanur aliba ajanga dang tesayur aser kaketshir mungdang balala takum alir ta tangatetba tajung nung LKM aser tesayurtem külema longjemer kaketshirtem ajungkettsü asoshi item timtem temaba ketdangsür den lemsatepsü aser akangtsü lemsatep. NECTAR (PIG) project den külemi nübur teyaritap ajanga Government school aika tejakleni renloka aoba ngua liasü, ta sangdong ajangasa ashi.



Government High School Mangmetong nungi HSLC tatidang nung takok angur nem tenüngsang agütsüba sentong ka May 26, 2023 nü agia liasü. Iba school upgrade asüba sülen küm toku nung HSLC tatidang agütsür noklang nung noklang shilem-i takok ngutetba taküm agi pezüben buba alitsü aser result tsütsü state nung Government school tajungtiba tem rongnung ka lir.



May 31, 2023 nü San Francisco, USA nung Congress lenir Rahul Gandhi-i yangji aliba India nungertem den jembidang tangokba noksa nung angur.

### Rahul-i bendanglen semdangdang India mezüngmeshir: Anurag Thakur

**New Delhi, May 31 (Agencies):** Congress party lenir Rahul Gandhi-i United States nung jembiba o aija Bodhbarnü Union Information & Broadcasting Minister, Anurag Thakur-i, Rahul Gandhi-i bendanglen semdangba mapang nung linük mezüngmeshir, ta ashi.

Thakur-isa, bendanger lenirtemi Ato kilonser, Narendra Modi tenüing asangbaji Rahul Gandhi-i khenyongi magizükteter, ta ashi.

"Rahul Gandhi-i bendanglen semdangba mapang shia India mezüngmeshir. Ato kilonser Modi-i alima nung Tirtem aser Ato kilonsertem 24 ajuruogo aser senden 50 dak tema menogo. Tawa Australia Ato kilonser, 'PM Modi ya Boss' ta ashi, Italy Ato kilonseri, Modi ya alima nung nüngtugutiba lenir ta ashi aser linük ka nung Ato kilonseri pa (Modi) tetsüing nung kongshia akhüm agütsü," ta Thakur-i ashi.

"Tanübo alimai India lenisüba nung teimla angur. Tesüiba küm 75 tsüingda yamai kodanga matalokdang. Ibaji atangji asen lenir ajanga lir aser nütsüing crore 140-i pa taliba akhümtsübur. Rahul Gandhi aser Congress party-i ibaji magizükteter," ta paisa shisem.

BJP lenir, Thakur-i, asen linük jenjang tajungba akümba mapang nung Rahul Gandhi-ibo iba atemaji tasüingdangba akar, ta ashi.

"Taoba mapangtem nunga pai (Rahul Gandhi) India ya linük ka ama mezüngshir. Pai asen linük ya union of states ta ashir aser India terenlok ashishir. Rahul Gandhi-i bendangleni aoba ajanga kechi ajangzükner? Pa teinyaktsü mapa ajak agi linük nem lishi paloktsütsü dang asü? Alima nung India jenjang maneni tajungba dang akümba mapang nung Rahul Gandhi-i India terenlok atema tasüingdangba akar," ta pai ashi.

1980s mapang nung Dalit

nungertem dak atalokba tang Muslim nunger dak-a ataloker, ta Rahul Gandhi-i jembiba aija Thakur-i ashiba agi, "Rahul Gandhi-i jembiba mapangji 1980s nung Dalit nungertem aser SC kibongtem tekübok jenjang nung liasü aser iba mapang nungji linük nung aser Uttar Pradesh state nunga Congress sorkar liasü. Pai shinübaji, Congress yimsüsüba mapang nung Dalit aser minorities timtema ali, ta shinüba lir."

"Parnok (Congress) yimsüsüba mapang nung linük rongsenkettzüng jenjang mejungi liasü. BJP yimsüsüba kübok India ya alima nung rongsenkettzüng tulutiba linük 5buba kümogo. Congress yimsüsüba kübok India nunger sobaliba amokmeren nung liasü saka BJP kübok asen sobaliba asentenshiogo. Tanü Rahul Gandhi-i India aser bendanglen India nunger mezüngmeshira linüki ibaji magizüktettsü," ta paisa shisem.

### BJP-i China anema surgical strike agitsüla: Asaduddin Owaisi

**Sangareddy (Telangana), May 31 (Agencies):** Telangana nung BJP Tir, Bandi Sanjay Kumar-i, party-i Telangana yimti tejenba nung 'surgical strike' agitsü, ta jembiba aija All-India Majlis-e-Ittehadul Muslimeen (AIMIM) tongti, Asaduddin Owaisi-i, yamaji inyaktsü agibo nenoki (BJP) China anema 'surgical strike' agitsüla, ta ashi.

Lokti senden ka nung jembidang Bandi Sanjay-i, Telangana nung ruling Bharat Rashtra Samithi (TRS) aser AIMIM Chief tongti lenir Owaisi-i Rohingya nungertem, Pakistan nunger aser Afghanistan nunger voters teyari agia Greater Hyderabad Municipal Corporation (GHMC) elections nung takok angutsü meranger, ta jembiba liasü.

GHMC election atema nüboyimba sentong ka nung jembidang Kumar-i, "GHMC election ji Pakistan, Afghanistan

as er Rohingyas voters medeni agitsüla. Onoki election nung takok anguba sülen yimti tejenba nung surgical strike agitsü," ta jembiba liasü.

Sangareddy nung lokti senden ka nung jembidang Owaisi-i, "Parnoki yimti tejenba nung surgical strike agitsü ta jembir. Nenok tasü itra nenoki China anema surgical strike agitsüla," ta ashi.

Union Home Minister Amit Shah-i AIMIM tongti Asaduddin Owaisi aser chief minister KCR na tsüingda tangatettep lir ta jembiba dak sendakba nung Owaisi-i, "Kü ket nung steering lira kechiba nai (Amit Shah) tashi meteter?" ta asüingdang.

"Tekülem kitem yanglutsü atema sen core aika agizükogo aser pai (Amit Shah), steering ji kü ket nung lir ta jembir. Kü ket nung steering lira kechiba nai tashi meteter?" ta pai asüingdang.



May 31, 2023 nü Hubballi nung Karnataka Deputy Chief Minister, DK Shivakumar-i party lenir Jagadish Shettar'er ki semdanga pa ajurudang tangokba noksa nung angur.

### NIA-i Karnataka, Kerala aser Bihar nung tesem 25 mita ao

**New Delhi, Monupii/May 31 (Agencies):** Popular Front of India (PFI) Phulwarisharif ken o dak sendakba nung Bodhbarnü National Investigation Agency (NIA)-i Karnataka, Kerala aser Bihar state tem nung tesem 25 shi mita ao.

Bihar yimtiba, Patna kübok Phulwarisharif area nung oziing alema inyaktsü nükjidong nung lokti adenshiba asalentong nung

PFI aser lenirtemi shilem agia lir ta bilemer.

Yaküm July 12 nü ken o ka benokba sülen iba ken o dak sendakba nung tamalen nisung trok apu aser PFI indang tashishitsü kaket kar puogo.

Taküm February 4-5 anogotem nunga NIA-i Bihar kübok Motihari nung tesem 8 ita aoba mapang nung nisung ana-Tanveer Raza (Barkati) aser

Md Abid (Aryan) na apu.

Iba mapang nungjagi tenzüka NIA-i PFI anema tesashiba mita aoer.

Anogo ishika tejaklen PFI trainer, Yakoob-i nisung jashidaktsütsü aser telok tsüingda rara adokdaktsütsü atema Facebook nung tashishitsü video post ka lemsatapa liasü, ta NIA-i metetdaktsü.

### Tanü Ato kilonseri Rajasthan nung election nüboyim tenzüksüogo

**New Delhi, May 31 (Agencies):** Rajasthan nung assembly election agitsü mapang ana nung lia Bodhbarnü Ajmer nung Ato kilonser, Narendra Modi-i ita ka piyong linük tesem ajaklen agitsü aliba Bharatiya Janata Party indang 'Maha Jansampark' campaign tenzüksüogo.

Iba campaign kübok Lok Sabha segment 543 prongla ayimjemtsü.

May 31, 2023 nü Modi-i Ajmer nung lokti senden ka nung "Maha Jansampark" campaign tenzüksüogo aser iba campaign ya May 31 nungi June 30 tashi agia linük tesem ajaklen sentong balala ayongzüka agitsü.

Iba campaign kübok tesem 51 nung lokti senden tulu ayongzüka agitsü, tesem 500 dak tema nung lokti senden alitsü aser osangbenertem senden 600 dak tema ayongzüka agitsü. Iba mapang nungji Lok Sabha constituency 500 dak tema aser assembly constituency 4,000 dak tema ayimjemtsü.

BJP puti otsü nung outreach

sentong tulutibaji ibai asütsü, ta BJP national general secretary aser iba campaign coordinator, Tarun Chugh-i metetdaktsü.

Tarun-i, "BJP lenir 288 aser party nung inyaker lakh 16-i booths lakh 10 aser cluster 144 nung Lok Sabha constituencies ajak ayimjema voters nem tesüiba küm 9 tsüingda Centre nung party yimsüsüba mapang inyaktetbatem metetdaktsütsü," ta ashi.

Iba sentong kübok June 25 nü Emergency Day anogomong nung documentary ka sayatsü aser iba documentary ajanga Congress-i democracy raksatsüba sangdongtsü, ta paisa metetdaktsü.

BJP nung inyaker crore aika, party MP 300 dak tema aser MLA 1,400 dak temai iba sentong nung shilem agitsü aser Modi-i aniba sorkari nüburtem atema inyaktsüba mapatem aser mapatong balala metetdaktsütsü. Yamaji BJP sorkari inyaktetba mapaji nübur ajaki metettsü, ta BJP lenirisa metetdaktsü.



May 31, 2023 nü Kenya nung Indian Navy indang INS Trishul rong aser Kenya Navy indang Jasiri rong amshia Maritime Partnership Exercise agidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR YANGTEPNÜ, AAMI(JUNE) 01, 2023

### Ali rongsen tazü mayoktsüla

**T**anü tashi asen lima nung ali telong aser tema nung aliba rongsen, ali mijang tera agiteta ayokba dak alaka ali telonglen atsüngdena akaba gari nung atsükba totzü nungi shir asen tenük agi nokdaka anguba süngdonglidongtem agi sen kuma asenoka asenok peribo kaa itta alitsü ano metenzük. Atangji, asenoki asen meyong ali telong aser tema nung akaba rongsentem agiteta amshitet nungbo, iba jagi asen peridang akatsüba masü saka asenok nungdak perir külenang mejungketa akatsüba inyaktetsü. Ajisüaka, tanü tashi asenoki asenok nem Tsüngremi moatsüba temoatsütem mamshitetba agi timatemer. Ibaji temeimeri asen nem chiyongtsü tajungka agütsü nung shipoka mechitet amai lir. Iba tensa tia ya kodang bilemdangdir, asenok ya ano alima nung nisung mesüka alitsü metenzüka ta asenoki asensasa angateter. Atangji, ibaji osang tamajung, tanganütsü maket saka kodang asenoki tanü asenok tia ya tajunglen bilemdangdir, tang tashi Tsüngremi asen nem ali telong aser tema nung moatsüba rongsentem agiteta mamshitetbaji chiyongtsü tajung tera dang asüba agi chimadoktsü ajema mechii dang tanurtem nem anünga yutsü amai lir. Alima nung ya koba putu nung shir lidir liang, parnokji lirbo alima tembangtsü ta masü saka parnok telidak purtem asoshi tebilemstü aser teinyaktsü tulutibaji parnok sülen alima nung lia aotsü purtem atema alima tajungba kuma yanglur toktsüsubaji lir. Ibayongji, asenoki süngdong atemer, ali telong akaba mijang tur külen ali tasen agi ano tanaben süngdonglidong meitsüsa nembanga toktsür, ayong nung takaba ajak remoka asütsüsa ango apudang mim mozü mamshir, arem nung shiruru aser ozüsangnü tanur bena alidang aser entsü amokdang mesüra techanu tain mekümtet anishidang mashimashi asen chinüongnü apia mekhaseter aser mesamatsür. Item mapa ajakji maginü aser mechinüba agi masü saka tarutsü indang bilemba ajanga peisasa pei azüoka inyakba mapatem lir. Iba tangatetbaji asenok ajak dak alitsüla aser kasa tangatetbaji asen aolen ajak nung jembitsüla. Atangji, tanü asenoki Tsüngremi moatsüba rongsen lenmang karbo nguteta amshir, saka asenoki item temoatsütem nung jagi tajangzükbo tesaadanga magitetsüsa tangar nem inyadoktsür mesüra tangar dangi jenjang dalang agi tagitsü oset mesüra tachitsü chiyongtsü kuma meyanglutet ser tazü yoker. Iba jagi asenok kanga akoksar. Aji oda, tanü asenoki asen lima nung adokba süng aser aou süngküm tsünga tangleni yoker aser iba jagi tangar lima nung tagitarutsü oset kuma yanglur ano tanaben asenok dangi yoker. Idangjibo, asen rongsen agi yangluba rongsen to ano tanaben asenokisa jenjang noklangben agi talila agi alir. Ibaji asenoki asenoksasa asen rongsen agi tamen aser terenem kuma awazür achitsü aser agitsü memetetba ajanga lir. Kena tajung kaji, asen lima nung süngo lu tesem aika nung takok ngua yimdagi aser item süngotemji süngo tajemtsü kuma yanglur tangaleni yoktsüsa süngo menünga factory aika lapoka lir. Idakji temulung achir. Ajisüaka, ano idakjia asenoki tajangzük shilem tulubalenkabo magitetsüsa tangar tüzumartem nem inyadoktsür. Kasaji, asenok aikati rubber lu kanga junga ayimer saka alu rangben tangar tüzumar nem agütsür yimdoktsür. Atangji, item mapatemji asenoki inyak mashi mesüra inyaktsü nübo maliba ajanga asütsüsa akok saka akok tashi asenoki asen meyong rongsen tazü yoksa meindoki asenoki asenoksasa tamen kuma jenjang keta yanglur agitsü merangtsüla. Tanü tashi tsürabur kolok aser shisatsü agi ali rongsen ajak agiteta mamshitet yutsüsubaji, lanurtem asoshi talila temoatsü kumer, parnokia tarutsü parnok chirnurtem aser parnok chirnurtem asoshi bilema melamelaa takaba ajak tazü yoksa meindoki akok tashi Tsüngremi ali nung remja akaba rongsemtemji apayua agiteta amshitsü aser kasaji ano tanabena meitetsü, adoktsü aser poktetsüsa inyaktsüla. Atangji, tanübo asenokia mersü masü saka lon (pickle) kuma yanglur bendang limatemi yoker. Ibaji mesüka mapa ajak nung akok tashi asenoki tazü masü saka tamen aser terenem kuma yanglur ayoktsü merangdi.

## OLEMSABANG

### AOR KILUNG OSET KAKET RÜSHIBA (BOOK REVIEW)

- T. Meren Paul, Lower PR Hill, Kohima


(Yashi adok nungi...)

29. Page 92, Nokleptsü denji tatakba **Nokleptsüyi** sayutsüla.
  30. Page 94, **Kokmopo** ta alibaji **Kokmo** ta ajar, ibai süngpok alangteta chiteta yanglur aser mimong nunga kodangah metongdaker anungji "po"masü saka auso tulu aser tekokrok (**basin**) anungji "Po" ji menoker saka **Kokmo** ta ajar.
  31. Page 97, "**Kümba Menüngtsü**" tenüng ji "**Menüngdong**" ta ajar. Kümba tejang menüngzüka endokba ya ang ainba mezüng mapa, iba sülen Kümba telongji meti akumtsü atema **Wotsüng/Eyetsüng** agi akahtsü aser **Pang**(spindle) aintsü. Angdong ainba dang **Pangain** ta ajar. Pang nung shilem (parts) palala - **Pangtong, Pangtsü, Pangrepositdem** amshia yanglur. Etem oset enkosemstüla.
  32. Page 98, "**Hodang**", Iba oset ya sü adakdang amshiba menden aser **Takra** ta timbakati ajar.
  33. Page 105, tajichilen sayua aliba noklang Nok ya Aor masü saka Konyak, Yimchunger aser Khiamungan nungeri amshiba nok. **Milemnok** ta ser takar amshiba Nok ka lir aser **Nokju** ta ajaba ali ongken atuba Nok tejen agi yangluba Nokju amshir.
  34. Page 108, "**Kusünok**", Sayua aliba ya yemdangjem (imagination) asütsü südi saka akhitejen Kusünok ibai masü. Kusünok ji yongmen in(brass) agi yanglur. Laya aser Yongmen in chibo tejaksa agi yanglur. In shipak teraka tekokrok (slightly concave) tapak temeyong pezülem, inch 3x4 (approximate size, rectangle) lungzük nung kanga chiraa ayier ku tsüng alener. Tanur asüadang Merangkong yimdak Deobar nekongtsütsüSünglang makum nung mener kenchi (scissor) agi ku mejeper tekongnem aser tenaba nung iba kusünok agikutsüng aongbaji kanga tashi maremteti nüksü atsünga akah ta asüadang kulener jagi "tebur chanu hmmm ta hangma" ta sa ajungshiba bilemteter. English translation nung machete ta ashiba yabo Nokchi dang ajar saka Kusünok yabo Machete masü Crude Razor. Kusünok ya in shipak tila ka (rectangular) aser apang maket.
  35. Page 129, "**Seret**", Iba ya Aor Seret, SüngtenSeretdong tazünglen alenloka aliba lisü pezüji touzük palala agütsütsü atema tasazük mongjen palala lenpoka lir. Molok tekalen mezüng sendakba süngzүjagi **Süngti** ozüktsü (tüzumar seret 2 den kasa) Tanapuba sendakba süngzү jagi **Puapak** ozüktsü (tüzumar seret 1½ den kasa), Tasempuba sendakba süngzү jagi **Tzumasüng** ozüktsü (tüzumar seret 1 den kasa). Yamajisa pezүpubaji eshiba ozüktsü.
  36. Page 132, "**Süzüng**", English translation: **Elephant creeper** ta alibaji "**Sword bean**" ta melentsüla. Page 50 nung **Sword bean** ta amshiba amah kasaji amshitsüla.
  37. **Bamboo strips**, ta English translation nung aliba ajakji "**Bamboo splint** mesüra **Bamboo Splits**" ta amshiba tapetba asütsü.
- Menoksemba Karh.**
38. **Lentsübong**- Kürabo tulu nung akchi artsü aser mokonger külen Jedang (tzüshi dang tatsüba) nung Kuota agi taoktsü aser kimalua ak nem chi agutsütsü bener alutsü. Iba Jedang dang Lentsübong ta ajar.
  39. **Purpo**- Kidang kinük külen azüklen satem ka, "Purpo"atemtsü aser yangji chiboanonbo tejen, aser mamshiba oset tejen ajak arangketa ayur.
  40. **Yisembong**- Tebur tain aremstüinlen mesüra aintsüinleni aodang iba "**Yisembong**" nung mejemtsü nung piya tepoka bener aotsü aser kodang yaa aidir ayongnu/tzүpokdak ka nunganener yangji Yisembong nungji tzü tera enoksemer semsaer ajemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

# Iraq nung Khristantemi pei oshi wazüka ayutsü atema inyaker



May 10, 2023 nü tangokba noksa nung ya Iraq nung Nineveh province kübok Khristan nütsüng teimba aliba Qaraqosh yimti nung Syriac Museum nung inyaker kati Syriac oshi nung zülua aliba longpak ka merüktetdang tangokba noksa nung angur.

**Baghdad, May 31 (Agencies):** Iraq nung Khristantemi pei akhi oshi wazüka ayutsü nükjidong nung television channel tasen ka tenzükogo; Iraq nung Khristantem oshi Syriac ya küm 2000 tejaklen nungi jembia aru saka iba oshi samaa odar.

Syriac oshi ya 'Aramaic' oshi nungi jakzük, aser Aramaic ya Yisu Khristai Pa alima nung alidang kanga bulua jembiba oshi liasü.

Iba oshi ya Iraq aser kidanger linük Syria na nungi Khristantemi jembir. Iba oshi ya pei kidang dang masü saka school aser tekülem sentongtem nunga jembir.

Ajisüaka Iraq aser Syria na nung Syriac oshi jembirtem kanga ajema kümogo aser iba ya küm aika linük nung rara ajanga Khristantem aikati pei linük toktsür bendanglen jenokba agi lir.

Iraq nung tesüiba küm 20 tsüngda Khristan nütsüng shilem asemsü nungi shilem anabo ajema kümogo ta asadangteter.

Syriac oshi nung Al-Syria television channel ketdangser, Mariam Albert-i, "Atangji onoki kidang Syriac oshi jembir saka tia maka onok oshi ya tanemtanemi samaa odar," ta ashi.

Iba oshi kümzükä ayutsü nükjidong nung Iraq sorkari taküm April ita nung iba channel tenzükä liasü. Iba channel nung inyaker staff 40 shi lir aser cinema nungi tenzükä puti otsü dak sendakba program balala iba channel nung sayur.

Iba channel nung Program teimbaka Syriac oshi agi sayur saka osangtsüsangbo classical Syriac ajanga dang agiba agi nisung aikati mangateter, ta nisung kati metetdaksü.

Al-Syria channel nükjidong ya sentong balala

ajanga Syriac oshi kümzüksü atema lir, ta station director, Jack Anwia-i metetdaksü.

"Mapang ka nungbo Syriac oshi ya Middle East tesem ajaklen jembia liasü, anungji iba oshi kümzükä ayutsü teinyaksü shilemji Iraq lir," ta pai ashi.

Iraq ya meimchir tenzükba tesem lir ta züngshir. Iba linük nungsa Abraham asoba Ur yimti lir.

Tanübo Iraq nung Shiite Muslim nungger aika lir aser linük nungsa Sunni Muslims, Kurds, Khristantem, Yazidis aser tanga minorities aika lir. Linük nung official oshi anaji Arabic aser Kurdish oshi na lir.

2003 küm jakdang United States-i Iraq mamakba mapang

tashi nungbo iba linük nung Khristan million 1.5 shi liasü saka tangbo Khristan nütsüng 400,000 shi dang kümogo.

2014 küm nungi Islamic State (IS) kiralongrartemi Iraq nung parnok yimli amenoktsü atema atsünga agiba mapang nung Khristan aika tepset aser aika jena ao, aser tangbo linük nung Khristan nütsüng 400,000 shi dang lir aser parnok teimbaka north tsütsü alir.

Arbil nung aliba Salahaddin University nung Syriac language department nung tongti, Kawthar Askar-i, "Syriac oshi ya tezülen sendokogo. Iba oshi ya tasü, ta ashir masü saka samatsüsa amokmeren tensa ka nung lir," ta metetdaksü.

# North Korea nung sarasademba atema Khristan pongu apu

**May 31, 2023:** Communist linük North Korea nung April ita tatembanglen ozüng alema sarasadema lia Khristan pongu puogo, ta osang ka ajanga metetdaksü.

Khristan ponguji kibong ka nungi dang züngsemtem lir; nisung kari osang metetdaksüba nung ajemdaker police-i par ki mita aoba mapang nung parnok ajak apu, ta May 28 nü osang ka ajanga metetdaksü.

April 30 nü South Pyongan province kübok Sunchon yimti anasa aliba Tongam yimdak Khristan kibong jagi hopta shia sarasademer, ajioda parnok sarasadema aliba mapang police aru.

Shidakba agibo Khristantem jagi ozüng alema meinyak, kechiyong parnoki yimjak nung sarasademba masü mesüra Khristan yimsü dangi meyiptsü atema parnoki shinga majungshi, ta nisung kati metetdaksü.

Tetsür kati, "Parnok külemi Lai zünga sarasademba mapang nung apu. Parnok ajak kinüngertem dang lir aser

parnok sarasadem tesüdak mapang nung apu," ta metetdaksü. Parnok sarasademba tesem nungji police-i Laishiba aika apu.

"Ketdangsertem jagi Khristan pongu dangji nenoki Khristan yimsü tokjang ta ashi saka parnoki Khristan yimsü toktsütsü memelung aser Yisu Khrista atema asütsü melunga dang lir," ta lai ashi.

US Commission on International Religious Freedom (USIRF) report ajanga ashiba agi, alima nung Khristantem tamajungtiba reshikangshiba linüktem rongnung North Korea densema lir. Iba linük nung Khristantem aika apur, shi nung reshikangshir mesüra tepseter.

US nung amenoka aliba Khristan temeden atema inyaker telok Open Doors-i report ka ajanga, tang North Korea nung Khristan 50,000-70,000 shi pua lir, ta metetdaksü.

Tongam yimdak alir kati, 1905 küm Japan nunggeri Korean Peninsula amakba

# ANOGO ABEN TSÜNGREM DEN

## Kecha makaba atema tenüngsang (T.ken 106:6-15)

Khen khenbo asenok asoshi sarasadem melangzübaji tajungtiba lir. Ken züluri ashir, "Aser parnok temepishiba pai parnok nem agütsü, aser parnok madak tashidak yok" (t.15). Israel nunggeri merumerua sarasadem. Tsüngremi Kotak nungi parnok manna agi mesüa liasü, saka parnoki shi chinü. Anepdang shia parnok teinyaksü ajunga agi süki nungi adoka angüma lur senti, temerük, tanang, taküm agütsüba manna shitentsübaji dang liasü. Saka mapang tatsü ka nung parnoki akhi chiyongtsü chiyongnüa aküm. Parnoki ashi, "O, kari onok nem tachitsü shi agütsü asübo." Anungji Tsüngremi parnok nem shi agütsü, saka parnoki aji achi aika asü (Züng. 11:31-33).

Iba nungi asenoki lesson angazüktsü akok. Mezüngbuba, merumeru sarasademji lendong. "O Tsüngrem, ni ibai dang aginer," ta ashitsübaji koda lendong ? Iba ama sarasadem nung kodanga tajangzük mali. "Nai asüngdang aser mangur, kechiaser nai aibelena meshir, nai ne tejangraba nung amshitsü meshir" (Yakob 4:3).

Tanabuba, nai ne jakla melenshitsu. Israel nunggeri parnoki mepishiba angu, saka parnok jakla nung meyari. Shitakba nung parnoki meshiba ngur külen parnok jakla tamajungba aküm. Tamadokba chiri ashi, "Oba, kü nem kua." Pai meshiba pai angu, aser pa taküm raksa. Idangji pa kidangi aru aser ashi, "Oba, ni yanglujang"- aser pa jakla melenshi. Pa shidakba jabaso ka akümstsü tenzük (Lk. 15:19). Merumeru sarasademi asenok jakla tap küm daksür, saka Tsüngremi mulungba ama sarasadem agi asenok jakla yanglutsü.

Asembuba, asenoki teti Tsüngremer mulungba asoshi sarasademtsüla. Sarasadem nükjidongji nisungi mulungba kotak nung inyaksüba masü, saka Tsüngremi mulungba alima nung inyaksüba nükjidong lir. "Ne mulung süang" ta ashitsü kodanga tarendak.

Ne sarasadem koda langzüksü Tsüngremi tajungtiba metet- itemji langzüksü melangzüksü. Ken züluri sarasadem telangzuba angutsüsa sarasademtsü tetuyuba asem agütsür. Nai itemji ne sarasadem nung amshir asü masü? Tsüngremi ne sarasadem Pai mulungba den sendaktepa amshidakjang. Pa telangzuba asoshi Tsüngremi na renemdakjang.

mapang nungi iba yimdak Tenla meraksatsüi liasü aser linük yimsüji Shinto aküm, ta metetdaksü.

"Tenla kiji tenemtsüng nung liasü, aser iba nungji missionary tem liasü," ta lai metetdaksü.

Iba Tenla ki ya 1997 küm khen aser 2005 küm khen, ta anaben tashi security sepaitemi mita aru aser Khristantem labor camps-i yoka liasü.

Japan nunggeri Korean Peninsula yimsüsüba mapang nung Sunchon nung Catholic Tenla ki ana den Protestant Tenla ki 31 liasü. Tesüiba küm aika tsüngda ketdangsertemi reshikangshiba ajanga tamangertem aika samaogo.

Korea ya melemsai ka dang liasü aser Joseon tamarener kibongji küm aika (1392-1887) yimsü süa aruba sülen Japan nunggeri amak. Aso 18buba aser 19buba nung Joseon y im s ü s ü r t e m i reshikangshiyonga Khristan yimsü kanga prokshia liasü.

World War II sülen Japan nunggeri yimsüsüba anen aser Korea ya linük ana kuma

lemdang. Democratic South Korea-i anüolen linüktem den aden aser North Korea nung Soviet Union kübok communist yimsüsüba tenzük.

Linük ana ka kuma longjemtsü merangyonga mangatettep aliba ajanga Korean War (1950-53) liasü aser iba mapang nungji communist sepaitemi South Korea amakdang nisung million 4 shi asü aser nisung million 10 shi jenshia liasü.

North Korea nung communist-i, Khristantemi US-i aniba anüolen linüktem den amalitepa inyaker, ta tai tonglokja Khristantem reshikangshi tenzük aser Tenla kitem raksatsüba den Khristantem aika reshikangshia tepsetba ajanga parnok aika South Korea-i jena ao.

2020 küm October ita nung North Korean Human Rights (NKDB) report ka ajanga, North Korea nung Khristantem reshikangshiba tatalokba 1,411 liasü aser Khristan 126 tepsetba den Khristan 94 sama, ta metetdakja liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rama**

(v) shisatsü makai aküm, bilemtettsü tashi makai aküm (loss of memory, forgetful)

\* Tantsür tambur akümdang shisa ramar.

**Rama**

(v) tamagitsü, amajok, takoksa ( loss, useless)

\* Rama nung ni kidang among.

**OLONG PAITEP # 6532**

	1			2		3	4
5						6	
7		8					
					9		
	10						
11							12
				13			
				14			
15							

**TIPIEN**

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

**LANGTSÜNGLEN**

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

**OLONG PAITEP # 6531 TELANGZÜBA**

**TIPIEN :**

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.



**2023 MAY ITA LILI RESULT !**

May ita nung Lili tajungtiba (First) shimteta tanü yangi lepshia agütsür. Lili zülur-i June 10, 2023 tashi nung Tir Yimyim Office nungi senpet agizüksü mepishia metetdaksür.

**NAGALAND DEPARTMENT KA NUNG GOVT. QUARTER TEM NUNG RONG ATEPTSÜ(PAINTING) ATEMA QUOTATION BENDENBA YAMAI ARU :**

Mian nungba = 3 crores.

Bihari nungba = 7 crores.

Naga nungba = 10 crores.

**Tulur** : Nenok aseme quotation agütsüogo, kechi koma inyaksü plan lir kati khen kati khen rasaa shiangjong.

**Mian nungba** : Sir, kü planji ya ati- crore 1 rong (paint) alitsü, crore 1 labour taa, aser crore 1ji tajangzük ta ati.

**Bihari nungba** : Sir, yamai ati- crore 3 paint alitsü, crore 2 labour aser crore 2 ji profit ta pilema lir.

**Naga nungba** : Sir crore 4 na atema, crore 3 ni atema aser crore 3 jagi Mian nungba nem inyadaksütsü ta pilemer ati.

**Tulur** : Excellent, contract ji na nguogo.

- Lilir : WhatsApp

**Sikkim nung district 3 shia MP kaka alitsüla: CMPS Golay**



**Gangtok, May 31, 2023 (Agencies):** Sikkim Krantikari Morcha sorkar küm pezü ajungba benjung ka Bodbarnü Gangtok nung mongogo.

Iba sentong nung Sikkim CM Prem Singh Golay-i Sikkim nungi Member of Parliament talila nungdakba indang jembi.

"Sikkim nung district 6 kümogo anungji MP talila alitsüla. District asem shia atema MP ka nungdaker. Tesüiba nung Sikkim nung district 4 dang liasü saka iba mapang MP talila

mebendenlok saka tangbo district aika kümogo anungji MP talila alitsüla" ta CM Golay-i ashi.

Tanü CM Golay-i state sorkar mapa inyakertem ayongzüka jembidang state tajungba len anitsü atema 'Team Sikkim' ama longjemtsü aser iba ya tawa Prime Minister Narendra Modi-i 'Team India' ta ashiba den kasa asütsüla ta ashi.

"Onok anema ashishitep ken o tem liasü aser 'ad-hoc government' ta aja aser küm ka

nung loksatsü ta ashi. Ni CM mesüra MLA inyakba atema parnoki ashishitep aser 2019 tashi matongdang Panchayat elections nunga shilem magidaksütsü ta ashi. Ajisüaka ni item ajakji ni ajungmesoba ka ama agizük aser küm pezü tashi sorkar ketdangsüa arur. Iba ya sorkar mapa inyakertemi len aniba ajanga lir. Tesüiba küm pezü tsungda Sikkimese sorkar mapa inyakertem aser sorkari 'Team Sikkim' ama inyaka aruogo" ta CM Golay-isa ashi.

**Goalpara nung forest guard tepsetba atema nisung 8 apu**

**Guwahati, May 31, 2023 (Agencies):** Goalpara nung süng auyartemi forest department ketdangsür ka khasetba dak sendakba nung nisung 8 puogo.

Parnok ya Bhadreswar Rabha, Mohen Rabha, Dulal Rabha, Suraj Rabha, Prahlad Rabha, Ananda Rabha, Prafulla Rabha aser Rajni Rabha nunger ta jangjaogo aser Dudhnoi Police Station nung puoka lir.

Goalpara kübok Krishnai

Salpara Darapara nung forest department ketdangsürtemi süng auyartem anema mapa inyakdang iba lendong atalok. Süng auyartem ta temulung meleme bilemba telok kati forest ketdangsürtem amak. Ano ketdangsürtemi tractor ka den süng bendena ayuba ayuba sülen iba tesem nung alirtemia ketdangsürtem dak teka sangshia liasü.

Iba mapang süng auyartemi forest department ketdangsürtem ket nung mobile

phones aser hon ring ana auya.

Iba lendong nung forest department ketdangsür Rajbir Ahmed asü aser ketdangsür asem Mobinur Rahman, Najrul Islam o Mustafa Ali nunger Gauhati Medical College and Hospital (GMCH) nung anepaludar.

Iba tesem nungi kümzükba sülen Rajbir Ahmed ji Solace Hospitalm Goalpara-i anir ao aser idak nung jagi Excel Care Hospital, Guwahati-i belen saka pa asü.

**Mizoram sorkari Centre dang Rs 5 crore teyari meshir**



**Aizawl, May 31, 2023 (Agencies):** Manipur nungi nisungtem Mizoram nung arua jenokba atema Mizoram sorkari Centre dang nungi Rs 5 crore teyari meshiogo.

Manipur nungi Mizoram nung arua jenoka alir anepalutsü atema state home department-i Centre dang senotsü teyari meshiogo ta State home commissioner & secretary H Lalengmawia-i ashi.

"Taoba Ministry of Home Affairs (MHA) dangi internally displaced people yaritsü atema Rs 5 crore teyari meshiogo. Centre-i senotsü teyari agütsütsü

ta onoki imlar kechiyong internally displaced people ya India sensotem lir" ta home secretary-i ashi.

Manipur nungi nisungtem maneni Mizoram nung arua jenoker. Mongulbar tashi nung parnok nisung 8,532 kümogo ta Lalengmawia-isa ashi.

Parnok teimbaka yimtsüng balala nung temporary shelters nung jenoka lir aser kar pei pei kinunger den anenzüka lir, ta paisa shisem.

Sorkar, NGOs, arogotem aser village ketdangsürtemi chiyungtsü aser tanga nungdakattem agütsür, ta

Lalengmawia-isa metetdaksü.

Tang tashi nung state sorkari chiyungtsü, anenzükdak aser tanga relief items atema timtem kecha majuru lir kechiyong jelia nungi item ya renema liasü. Ajisüaka tarutsü anogotem sorkari khuretem ajurutsü akok kechiyong Mizoram nung Myanmar aser Bangladesh nungi nisung 35,000 tema anenzüka anepaluogo, ta pai ashi.

Mizoram kübok tesem balala nung Myanmar senso 34,000 aser Bangladeshi senso 1,000-i asylum meshia anenzüka lir.

Manipur nunger Mizoram nung arua jenoka aliba atema Manipur sorkar nungi osang kecha mali ta Lalengmawia-isa.

Manipur nungi nisung 3,022 Kolasib district nung, nisung 2,875 Aizawl district aser nisung 2,252 Saitual district nung jenoka lir ta Mizoram home department-i metetdaksü.

Tanungba nisung 383 ji Champhai, Khawzawl, Hnahthial, Serchhip, Mamit aser Lunglei district tem nung jenoka lir ta parnokisa ashi.

# North Korea indang spy satellite tzyim nung tsük

**Pyongyang, Monupii/May 31 (Agencies):** North Korea-i par indang space satellite mezüngbuba anüngleni khaketa yokba nung timtem ajurua tzyim nung tsük ta ashir.

US mitkar inyaksangshi itdangitersü atema satellite ka June 11 tashinung yoktsü sentong lir ta Pyongyang-i taoba mapang sangdonga liasü.

Tang parnoki akok tashi tekeraba nung tanabuba satellite yoktsü merangtsü ta ashi.

Iba satellite anüngleni yokba ajanga South Korea yimtiba, Seoul nung 'false alarm' ka agütsü aser Japan nunga linük south tsütsü Okinawa nung alirtem dang tekum dangtsü ka sangdonga liasü.

Seoul nung tayimtsü amshia amakdang agütsüba ola ka agi nüburttem sak aser emergency message ka nung parnok dang pei aliba tesem nungi ainshitsü asoshi renemtsü shia liasü, saka minute 20 sülen ibai aibelena yokba lir ta ashi.

Korean Peninsula nung tensa kanga majung lir aser linük ana tsüngta küm 70 shi mangatetep nung lia arur, aser tiazü nung alarm agütsüba yagi nüburttem alert system nung tamang akaba samatsü.

South Korea indang mitkar temi ashiba agi, rocket ya anüng tom nung raksa mesüra radar nungi samaba sülen tsük südi. Parnoki tzyim nung satellite teraksa ngutetba indang noksa tem sayua liasü.

Japan Ato Kilonser Fumio Kishida-ibo North Korea-i ballistic missile ka khadok mesüker aser sorkari tali tejangjaba nung asadanger, ta ashi.

Iba satellite ajanga teraksa agütsüba osangbo mali. Taoba

mapang Japan-i par litsü chairman, Ri Pyong Chol-i iba amokmerentsüsa kechi lider satellite anüngleni khaketa ajakji khazüka yoktsü ta shia yoktsü osang ya sangdonga liasü aser ibai US aser South Korea mitkar temi tim masüba

Mongulbarnü North Korea nung ruling partu indang central mapa inyakba mechi lir ta ashi. military commission vice- (Maneni tapak 8 nung...)

**GOVERNMENT OF NAGALAND**

Office of the Principal  
Institute of Communication and Information Technology (ICIT)  
Mokokchung Nagaland  
www.icitmkg.in

**ADMISSION NOTICE**

Applications are invited for 2<sup>nd</sup> Round Admission (Addressed to the Director, Directorate of Technical Education Nagaland Kohima) to 3-year Diploma Programme for the academic session 2023-24 for the following branches.

Sl. No.	Branch	Eligibility criteria
1	Computer Engineering (CPE)	Class 10 with Math and Science passed
2	Information Technology (IT)	
3	Electronics and Communication Engineering (ECE)	

**Salient features: -**

1. ICT equipped classrooms
2. Library with 9000+ volumes of books
3. Industry oriented curriculum as per AICTE
4. High speed internet connectivity in the campus 100/50 Mbps
5. Well-equipped separate hostels for both boys and girls
6. CCTV covered safe and secure academic buildings

Last date for submission of application is **15<sup>th</sup> June 2023**.  
Contact us: 9856769522 / 7005974574 / icitprincipal@gmail.com

Sd/-  
(Er. P. Limameren Chang)  
Principal i/c

**Office of the Teachers' Union Mangmetong**  
Mokokchung : Nagaland

**TENÜNGSANG AGÜTSÜR**

Teachers' Union Mangmetong ajanga GHS Mangmetong nungi kaketshir kwikati HSLC tatidang nung takok tajung ajangzukteta 100% küm 4 tashi ngutetogo, union ajanga kaketshir aser tesayur ajak dang pelaba lemsateper.

Ano maneni Kr. Imlimerenla Pongen, D/o Wb. Temjensowa aser Wt. Imdanglemla, HSSLC Arts Stream (NBSE) nungi top 8 jenjang tongtetba aser Sb. Talinungsang Imchen S/o Wb. Moameren aser Wt. Arenla, HSSLC Arts Stream (Meghalaya Board Exam) top 6 jenjang ngutetba asoshi tenüngsang agütsür.

Iba den taküm HSLC aser HSSLC tatidang nung sensosanger kaketshir kwikati takok nguogo, union ajanga nenok ajak den tetushi aser tepela lemsateper. Tarutsü nung nenok tazüngba wadang nung Tsüngremi moajangma.

Sd/- **T. Arnok Tzüdir** Chairman  
Sd/- **Imnatula** Secretary

**Kanga Pelaba Lemsateper**

**ASOBA**  
09.01.1999

**ASÜBA**  
24.05.2023

**Asür Limajungshi** (Changtongya Yimsen) shirangba mapang nungi pa akümüli tempangba tashi ozü kibong den kija, lokti aser arogo balala shirnoki ali rongsen, nübu aser sarasadem agi yariogo, nenok ajak dang tebang agi meshitetba tepela lemsateper.

**Tongtibangsa:**

1. Woodland Nursing Home
2. Pastor Ao Arogo. Jorhat
3. Mr & Mrs. Onemba. Jorhat
4. Mr & Mrs. Meren (Mission Hospital Jorhat)
5. Sunrise Kiyong Yimden.

~ Temeim Tsürabur, tedi tenu aser kinungertem.

**Office of the MERANGSEMCHIR TETSURTEM TELONGJEM**  
Chuchuyimlang

**TENÜNGSANG AGÜTSÜR**

Mr. Alinüngsang aser Mrs. S. Amongla, tena jala **Miss.Moatsüngla** M.A. Economic Gold Medal, St. Joseph University Dimapur nungi ngutetba asoshi asen Elangtsür-i konang tetushi tulu agütsür.

Maneni tarutsü anogotem nung nü tazüngba wadang nung Tsüngremi len ania moajangma ta sarasademtsür.

Sd/- **KIKAMENLA** President  
Sd/- **MAONGSENLA** Gen. Secretary

**CHRISTIAN STANDARD HR. SEC. SCHOOL**

Changtongya Town

Congratulations to all the qualified students of HSLC and HSSLC Examination 2023

HSLC, Appeared: 22, Passed: 22 1<sup>st</sup>: 22, 2<sup>nd</sup>: Nil, 3<sup>rd</sup>: Nil

**HSLC RANK HOLDERS**

S. IMDAN MOILI PHOM  
HSLC 9<sup>th</sup> Rank  
(Star marks in all the subjects)

JUNGSHINUNGLA  
HSLC 11<sup>th</sup> Rank  
(SS Subject Topper, star marks : Eng,Math,Sc,EE)

**HSLC STAR MARK HOLDERS**

IMOSOSANG  
AO-96

TIAMEREN  
MATH-97,SS-99,AO-95

MOYAN L PHOM  
ALT-ENG-93

MARINLA  
SS-99

NUNGTILONG  
SCIENCE-97

HSSLC, Appeared: 34, Passed: 34, 1<sup>st</sup>: 26, 2<sup>nd</sup>: 8, 3<sup>rd</sup>: Nil

**HSSLC DISTINCTION MARK HOLDERS**

CHUBAMANEN  
Pol. Sc

IMLIAKUM  
Pol.Sc,Edu

IMLIMANEN  
Eng,Pol.Sc,Edu

IMTTITONGZUK  
Eng,Pol.Sc,Edu

NGANGSHIKOKBA  
Pol.Sc

TEMSULUNG  
Pol.Sc,Eco

WALUTEMSU  
Pol.Sc

B LAOM PHOM  
Eng,Edu,Eco

IMKONGMENLA  
Eng,Edu

IMLIUNGLA  
Eng,Edu

IMTINARO  
Eng,Pol.Sc,Edu,Eco

LOMEI PHOM  
Pol.Sc,Edu

MEYLEMLA  
Eng,Pol.Sc,Edu,Eco

MOARENLA  
Pol.Sc

SUNGJEMRENLA  
Eng,Edu

TEMSUKUMLA  
Eng

TIAMENLA  
Eng,Pol.Sc,Edu,Eco

IMNATILA  
Pol.Sc

SENTITULA  
Eng,Pol.Sc,Edu,Eco

WAPANGSANGLA  
Pol.Sc

WAPANGNENLA  
Pol.Sc

WAPANGNARO  
Eng,Pol.Sc,Edu,Eco

YANGTILA  
Pol.Sc

**GS FOUNDATION COURSE**

Be the next NCS      Be the next IAS

**NPSC 2023**

**UPSC 2024**

**ADMISSIONS OPEN**

**TOP CIVIL SERVICE DOMAIN EDUCATORS**

**WELL RESEARCHED MATERIALS**

**THREE TIER TEST SERIES**

📍 Kohima, BOC, below PHQ

☎ +91 7005114715

**EduVersity**  
NPSC PREPARATION 2.0

## Pep Guardiola nem LMA, PL Manager of the Year naroküm agütsü



**Monupii/May 31, 2023 (Agencies):** Pep Guardiola nem, League Managers Association (LMA), Premier League Manager of the Year naroküm agütsüogo. Manchester City pur Premier League nung takok dangi aniba sülen pa nem iba naroküm ya Mongolbarnü agüja liasü.

Guardiola lenisüba nung City puri season trok nung league pongubenbuba kokogo. Parnoki season nung asaya asem anunga lia league akok aser parnok tanabuba jenjang nung aliba Arsenal team dang nungi point pongu agi timba liasü.

Tawa tembangba season nung City puri asaya 38 nungi 28 akok aser iba mapang goal 94 idakja liasü, koba Europe nung league tulutem nung temaba jenjang nung asaya team tem dang nungi kanga agi timba lir.

Tang City puri season nung asayamung tongtibang asemprongla akoktsü timla lir, kechiyong parnok ano June 3 nü Manchester United den FA Cup final aser June 10 nü Inter den Champions League final asayatsü lir.

"Kü nem LMA Manager of the Year naroküm agütsüba nung densema alir ajak dang kanga pelar," ta Guardiola-i ashi.

"Mezüngbuba nung ni iba naroküm ya külem nominee tem den lemsateper. Parnok ajaki season tepeyong kanga junga inyakogo.

"Iba takok marok ya na manager koda tajung aji apir masü saka ni takok kwika nguteter ibaji apir agütsür. Ni football club kanga tajung ka nung inyaker aser ni iba club nung inyakba mapang teyari balala agütsübatem medeni iba ya tamakoktsü.

"Ni asayartem nema tenüngsang agütsür shirnoki season tepeyong kanga junga asaya teyari agütsüogo," ta paisa ashi.

Kasa mapang nung Manchester City Director of Football Txiki Begiristain-i, "Pep ya kanga tesangra coach ka aser iba naroküm angutsü langa lir. Manchester City kodaser tajungtiba asayadaksütsü iba dak rangloker pai anogoshi inyaker.

"Pai iba football club jenjang kanga ajungkettsüogo. Pa

tangatetba aser bendanga agüja inyakba ajanga City tajungba kümogo.

"Manchester City dak sendaka alir ajaki Pep nem pai langa aliba ama iba naroküm agizükba atema tenüngsang agütsür," ta pai ashi.

Iba naroküm atema Guardiola-i, Arsenal coach Mikel Arteta, Brighton & Hove Albion coach Roberto De Zerbi, Newcastle United coach Eddie Howe, Burnley coach Vincent Kompany aser Plymouth Argyle coach Steven Schumacher nung ajateta liasü.

Kompany aser Schumacher nati Championship aser League One manager of the year naroküm agizük aser Leyton Orient coach Richie Wellens-i League Two manager of the year naroküm agizüka liasü.

Lauren Smith, shiba lenisüba nung Bristol City-i league koka liasü, lai Women's Championship award agizük.

Maneni arishi küm 73 tain taoba mapang Scotland, Celtic aser Manchester United midfielder Lou Macari nem mezüngbuba John Duncan Award agütsüogo.

## Thailand Open: Kiran, Saina & Chaliha nungeri takok angu

**Monupii/May 31, 2023 (Agencies):** India nung badminton asayar Kiran George-i Bodhbarnü Thailand Open Super 500 asayamung nung China nung world number 9 asayar Shi Yuqi straight-game nung koka pre-quarterfinals-i iogo.

Tetsür asayartem rongnungi Ashmita Chaliha aser Saina Nehwal natia kija asaya nung pei tata asaya kokogo.

Kidambi Srikanth aser B Sai Praneeth nung amala asayartem aika mezüngbuba round nung tsükba anogo ka nung Odisha Open koker alisang Kiran-i 21-18 22-20 agi iba asayamung atema third seed asayar Shi Yu Qi koka liasü, shibai 2018 world championships nung silver medal ngur lir.

Kiran taruba asaya China nung asayar Weng Hong

Yang den asayatsü.

Kasa asayamung tetsür kija asaya nung Ashmita, shiba qualifiers asayar külen iba asayamung nung shilem agitsü maongka nguteta liasü, lai külem India tsür Malvika Bansod 17-21 14-21 agi akok aser London Olympics bronze medallist Saina-i Canada tsür Wen Yu Zhang 21-13 21-7 agi koka liasü.

Ashmita taruba asaya Rio Olympic gold medallist Carolina Marin den asayatsü aser Saina China tsür He Bing Jiao den asayatsü.

Kasa mapang nung Srikanth 8-21 21-16 14-21 agi China nung asayar Weng Hong Yang-i tsükdaksüogo. Yang ya taoba hopta Malaysia Masters final tonga asayaogo.

Praneeth shiba Tokyo Olympics nung asaya liasü, pa-a France nung asayar Christo

Popov-i 14-21 16-21 agi kokogo.

Orleans Masters koker alisang Priyanshu Rajawat-a Malaysia nung asayar Ng Tze Yong-i 19-21 10-21 agi kokogo.

Taoba mapang world number 11 asayar Sameer Verma shibai tawa Slovenia Open kokogo, pa-a Denmark nung asayar Magnus Johannesen-i 15-21 15-21 agi koka liasü.

BWF World Tour ya, World Tour Finals, Super 1000 pezü, Super 750 trok, Super 500 tenet, aser Super 300 11 ta jenjang trok küma lemsar lir. Iba den BWF Tour Super 100 level densema lir aser iba asayamung nung shilem agirtem nema ranking points agütsür.

Super 500 ya BWF tournament ranking system nung Grade 2 (level 4) asayamung ka lir.

## BWF-i Russia & Belarus nunger asayartem atema lenmang lapoktsüogo

**Monupii/May 31, 2023 (Agencies):** Badminton achayangba lokti tentet temabai Bodhbarnü Russia aser Belarus nung asayartem neutrals ama tetoktepba balala nung shilem agitsü atema lenmang lapoktsüogo. Russia-i Ukraine amak tenzüka sülen linük ana nungi asayartem nem tenokdangba agütsür liasü.

Paris nung Olympics asayatsü küm ka shi lia saisapong balala achayangba lokti tentetem Russia aser Belarus nung asayartem a s a y a d a k t s ü t s ü masayadaksütsü mejangjai aliba mapang ka nung tang iba jenjang agiogo.

Russia-i Ukraine amak tenzüka sülen Badminton World Federation (BWF)-i Russia aser Belarus nung asayartem nem taoba küm March ita tenokdangba agüja liasü.

Ajisüaka BWF-i Bodhbarnü sangdong ka ajanga ashiba agi,

parnoki Russia aser Belarus nung asayartem neutral athlete tem ama asayadaksütsü asoshi regulative aser operational framework ka benokogo.

"BWF council-i, iba principle, framework aser Russia aser Belarus nung asayartem nem tenokdangba agütsür aliba agintsü asoshi mapang tatakzük ka atema telemtetba agitsü asoshi sensak asemtsü," ta BWF sangdong ajanga metetdaksü.

Council ya August ita Copenhagen nung ajuruteptsü.

Russia-i Ukraine amak tenzüka sülen linük ana nungi asayartem ya asaya balala nung tenokdangba agütsür lir.

March ita IOC-i, Russia aser Belarus nung asayartem neutrals ama international tetoktepba balala nung shilem agidaksütsü asoshi benoka liasü.

Badminton densema asayatem aika 2024 Olympics atema qualifier tenzüko.

## Satwiksairaj aser Chirag na world no. 4 tarep kümogo



Super 300 title benogo. Tenati asayamung 12 nung point 74,651 ngua lir.

Kasa mapang nung tebur kija asayar HS Prannoy shibai taoba hopta Malaysia Masters nung mezüngbuba BWF World Tour title benogo, pa jenjang ka tejakdangi tua tang jenjang 8buba

**New Delhi, Monupii/May 31 (Agencies):** India nung tebur tarep asayartem rongnungi CWG gold medallists Satwiksairaj Rankireddy aser Chirag Shetty na Mongolbarnü sayaba BWF rankings nung jenjang pezububai tuogo.

Tena jenjang ka tejakdangi tu tang mezüngbuba tena indang career nung iba jenjang ajanzüktetogo.

Satwik aser Chirag nati taoba küm Commonwealth Games nung gold medal angu aser French Open Super 750 koka liasü taküma tenati Swiss Open

nung lir aser ano tebur kija asayarsa Kidambi Srikanth jenjang asem tejakdangi tua top 20-i iogo. Pa dang 20buba nung lir.

Ajisüaka Lakshya Sen, Malaysia Masters nung kanga kara tsükatokba sülen jenjang ka asepzüka lua tang jenjang 23buba nung lir.

Tetsür kija asaya nung Olympic nung medal ana tashi ngur alila PV Sindhu maneni 13buba nung lir aser tetsür tarep asaya nung Treesa Jolly aser Gayatri Gopichand na 15buba nungi masetshi-i lir.

## North Korea indang spy... (Tapak 7 nungi...)

Linük ana yagi yimjak nung tashiyim amshitsü nükjidong sayur, ta pai tai tongloktsü.

South Korea aser Japan den külemi United States-i iba satellite launch ya aitsü aser ibai UN Security Council pangzüng aika nung aibelen lir ta ashi.

"Yimjung asoshi jembishinütsü kishi meshibang saka Pyongyang-i rara mesüba mapa anentsüla aser jembishinü akatsüla," ta National Security odongtar Adam Hodge-i ashi.

Ozü linük aser tembar linüktem kumzüka ayutsü asoshi US-i nüngdakba mera ajak agitsü, ta pai ashi.

UN secretary general Antonio Guterres-ia aitsü aser Pyongyang-i ballistic missile technology amshiba ya security council pangzüng nung aibelenba lir ta ashi.

North Korea lenir Kim Jong-un-i military satellites yangluba ya par linük defence asoshi tongti shilem lir ta ashir.

### BILEMDANGANG

"Nai jangraba ama alitsü tetsübo."